

սական էժանագին հացի ներմուծումը և ուշանում էր հացահատիկային մշակույթին կից հողամշակութային այլ, ավելի արդյունավետ ճյուղերի զարգացումն. ավելի համառորեն պահպանվում էին թե՛ դաշտամշակության և թե՛ անասնապահության ավանդական ձևերը: Տնայնագործությունը շատ դանդաղ էր տեղի տալիս գործարանային ապրանքների տարածմանը: Ներմուծված ապրանքների գները ծանրաբեռնվում էին ավելի բարձր վերադիր տոկոսով և առևտրամիջնորդական կապիտալն ավելի սուր կերպով էր ցուցաբերում իր վաշխառուական էությունը: Նույնիսկ XX դ. սկզբին պղնձի հանքավայրերի աշխուժացած շահագործումը չէր խթանում ճանապարհների բարելավումը և շնչին չափով էր ձևափոխում տեղական տնտեսական զբաղմունքների բնույթը, մանավանդ, որ հանքատերերն աշխատում էին իրենց անհրաժեշտ բանվորական ուժը լրացնել առավելապես Պարսկաստանից ներգրավված էժան աշխատող տարրերով: Զանգեզուրը մինչև սովետական կարգերը մնաց գերազանցորեն հետամնաց ագրարային լեռնաշխարհ, որտեղ հացահատիկային կուլտուրան նախնական անասնապահության հետ սերտորեն շաղկապված՝ բացառապես գերշխող էր, համառ պահպանվում էին տնայնագործական աշխատանքի հին ձևերը:

ԵՐԿՐԱԳՈՐԾՈՒԹՅՈՒՆ

Զանգեզուրցին ցանում էր առաջին հերթին ցորեն և գարի, ապա նաև հաճար, ձեթ ստանալու համար՝ կտավհատ (գանգրավուշ) և հըլածուկ, կորեկ և ոսպ: Գորիսի շրջանը հայտնի էր իր կարմիր ցորենով՝ Տեղ, Խնձորեսկ, Կոռնիձոր: Նախադասում էին աշնանացանը:

Վարում էին գլխավորապես ալաթավ՝ արորով: Գութանը ավելի հայտնի էր Սիսիանում, մասամբ էլ Գորիսի շրջանում, առավելապես Եռաբլուրի՝ Ուշթափալարի սարահարթում: Գործ էր ածվում² երկու տեսակի գութան. մեկը՝ անիվավոր— ալնէ գութան, մյուսը՝ անանիվ— կոի գութան: Երկու ձևերն էլ չէին տարբերվում հարեան նախիջևանի գավառում պատահող օրինակներից: Այդ ծանր փայտե գութանները, որոնք պահանջում էին 7-ից մինչև 10 զույգ լծկան, այժմ ամեն տեղ վերացած են: Գործարանային գութանը վերջնականապես հաղթել է: Նույնը չի կարելի ասել ալաթի մասին, որը դեռ դիմանում է գործարանային արորի մրցմանը: Նա ունի ավելի տեղական առանձնահատկություններ:

Վէսկի³, ալաթ: Զանգեզուրում հայտնի չէ հարեան Մեղրու հայկական գօրծէն անունը: Վէսկու էական մասն է կաղմում տաշած հորիզոնական կոճղը՝ առատամբ, որի առջևի սրած ծայրին նստեցրած է խօփը: Խօփի սուր ծայրը կոչվում է խօփի ծէր, հակառակ բութ և լայն կողմը՝ խօփի քնիփ, իսկ կողերը՝ ճանէր: Առատամբի հտեի բութ և ավելի հաստ մասին ուղղահայաց ամրացված է մաճը իր եղջյուրանման ծոված թէվէրավ, որոնցից մաճկալը

² Հմմտ. Зелинский С. П., նշված աշխ., էջ 79:

³ Ողջիի (Օխշիի) հովտում ասում են սարվազ, մի անուն, որը հայտնի չէ հարեան Արծվանիկի շրջակայքում: Նույն տեղում, էջ 80: Գորիսում չեն գործածում ալաթ բառը, այլ Վէսկի՝ թե՛ բուն գործիքի և թե՛ արդեն լծված ամբողջ կազմի համար: Alat, alet—արաբ. ակունք ունի: